

«Esser fidaivel a sasez»

Cuira: Discurs cun Andreas Caminada

DA GION NUTEGN STGIER / ANR

■ **Prestaziun maximala, quai saja passiu, perseveranza, plaschair, inspiraziun ed in pau stinadad, manegia il star cuschinier. Products da qualidad superiura, collavurats cun engaschament exemplaric e cunzunt giasts cuntents e generus sajan il recept per avair success.** Adina puspè envida l'Uniun grischuna d'artisanadi e mastergn a seminaris da la saira e quels sa drizzan cunzunt als commembers. La raschun da quels è da dar novs impuls a tuts patrums che mainan interpresas pitschnas u mesaunas e da sustegnair els en dumondas professunalas. Per l'enschatta da quella seria da seminaris da la saira è vegnì a pled cun *Andreas Caminda* in dals megliers cuschiniers da la Svizra ed in patrums che va da success a success. Il cuschinunz lumnezian vegn bunamain adurà sco in star da pop e ses restaurant Schauenstein a Farschno è in vair paradis per mangiabains e gourmets. En in discurs cun *Urs Cadruvi*, il secretari general da la Lia Rumantscha, ha tradì Andreas Caminada ses recept da success als 220 preschents glindesdi saira a Cuira.

«Classa empè da massa»

Entschet haja el avant 12 onns cun quatter collavurats ed oz sajan quai 35 collavurats, ha ditg Andreas Caminada. «Mes bab è dal reminent stà l'emprim lavaplats», ha ditg Andreas Caminada cun in surrir. Da lez temp saja quai bain stà in tschert ristg da surpigliar il chastè Schauenstein er cun blets strusch savair nua che Farschno sa chatta. Adina puspè haja el fatg patratgs sch'i saja in summa pussaivel da survivor cun manar in restaurant en in lieu che paucs enconuschan. Grazia a la motivaziun da ses emploiads ed a sia con-



Il director da l'Uniun grischuna d'artisanadi e mastergn, il star cuschinier ed il mainadiscussiu da la saira: **Jörg Michel, Andreas Caminada ed Urs Cadruvi (da san.).**

FOTO G. N. STGIER

fidenza tar els e cunzunt er grazia a la fidaivladad dals giasts saja stà pussaivel da far or dal Schauenstein in restaurant da renum internaziunal. Sco cuschinier haja el adina gi visiuins ed en collavuraziun cun ses emploiads, furniturs e natiralmain ils giasts saja igl stà pussaivel da realisar quellas. «Classa empè da massa, quai è mia devisa ed il recept da success», manegia Andreas Caminada. Ses giasts animeschan er adina da vegnir cun novs products, da crear novas cumbinaziuns e sia

tenuta saja er da far adina dapli diever da products regiunals. «En mes team hai jau ina persuna che va en l'entira regiun be a la tschertga da novs products», accentuescha Andreas Caminada.

«Senza pressiun vegn jau pultrun»

El saja e restia anc adina in cuschinier e tuttina haja el en quels 12 onns emprendì dad esser er ospitant. Esser ospitant saja ina chausa fitg plaschaivla, però il pli bain sa chatta el anc adina en cuschina,

ha ditg Andreas Caminada cun in surrir. S'avanzà saja el en quels onns er tar in pitschen «manager», dentant oz saja el cuntent d'avair cun sia dunna ina persuna dal rom quai che pertutga «management». Lavurar sut pressiun, quai saja tar el en cuschina la vita da mintga di e da lavurar cun da quellas premissas pretendia el er da ses cuschiniers ed auters emploiads. «Senza pressiun vegn jau pultrun», ha ditg il star cuschinier en il discurs cun Urs Cadruvi.

«Nus essan betg uschè buns sco nossas distincziuns»

Il restaurant Schauenstein è oz ina da las meglras adressas en Svizra e la cuschina d'Andreas Caminada valiteschan ils experts cun puncts, stailas e chapitschas e quai gist en seria. Quai saja lura er motivaziun per daventar anc pli perfetg, cuschinar anc pli fin e cun anc meglier gust. «Nus essan betg uschè buns sco nossas distincziuns», quai pensa el adina puspè, ha ditg il Lumnezian. Schauenstein saja betg mo la buna cuschina, mabain il giast apprezieschia l'entira aventura e quai fetschia grond plaschair. El saja in um che sappia exact tge ch'el veglia ed ina persuna che observa sias atgnas visiuins. «Esser fidaivel a sasez, quai è mes princip per avair success», punctuescha Andreas Caminada.

Fin 50 dumondas d'engaschament l'emna

Ademplir las aspectativas, quai saja natiralmain er in aspect impurtant per esser in bun cuschinier ed in patrums serijs. Passiu e plaschair tar la professiu, crair a las atgnas abilitads e restar modest, quai maina al success, manegia Andreas Caminda. In pau stinadad sco ch'el haja er fetschia dentant er betg donn. Da ses emploiads pretenda el ina tscherta loialitad e cunzunt adina in surrir er en situaziuns da stress. Cuschinar cun plaschair e servir cun in rir empernaivel, quai saja la meglra basa per far carriera en la vita professunala e daventar ina personalitad. Che Andreas Caminada è gia cun 38 onns ina gronda personalitad conferman bain er las 50 dumondas d'engaschament ch'el retschaiva l'emna da cuschiniers che vulan lavurar en il Schauenstein.